

**Imigassaq pillugu Inatsisartut inatsisaata
allanngortinneqarnera pillugu Inatsisartut inatsisaat
(Inuuusuttut imigassanik aalakoornartulinnik
sassaalliuteqartarfinni piffissami qaqugu
isersimasinnaanerannik allanngortitsineq,
niuertarfinni nioqquteqarnermut piffissat
ammaffiusartut sivitsorneqarnerat, imigassanik
aalakoornartortalinnik ussassaarinermik inerteqqutip
atorunnaarsinneqarnera; imigassat
aalakoornartortallit niuertarfinni
assiaqusersorneqarnissaannik atorunnaarsitsineq
aamma inuit sassaalliuteqartarfinni
isersimanissaannik inerteqquteqarfingineqarsimasut
pillugit paasissutissanik ingerlatitseqqinnissamut
periarfissaliissut)**

§ 1

Imigassaq pillugu Inatsisartut Inatsisaanni nr. 35, 23. november 2017-imeersumi uku
allanngortinneqassapput:

1. Inatsimmi tamarmi "03.00" ima allanngortinneqassaaq: "04.00".

2. § 20, imm. 4, imatut oqaasertalerneqassaaq:

" Imm. 4. Nal. 23.00-ip kingornatigut meeqqat aamma inuuusuttut 18-it inorlugit ukiullit
sassaalliuteqartarfinnut imigassanik aalakoornartortalinnik sassaalliuteqartunut iseqqusaassanngillat
angajoqqaaminnit, angajoqqaatut akisussaasumik imaluunniit inummik allamik inersimasutut
oqartussaassusilimmit inersimasuunngitsumut immikkut akisussaasumit ingiaqateqanngikkunik.

Akuersissummik pigisaqartup aamma taassuma sulisuisa pisussaaffigaat nakkutigissallugu inuusuttup 18-it inorlugit ukiullip pissusissamisoortumik ingiaqateqarnissaa."

3. § 25, imm. 1, imatut oqaasertalerneqassaaq:

"Imigassanik aalakoornartortalinnik nioqquteqartoqarsinnaavoq ataasinngornermiit arfininngornermut nal. 10.00-imut 20.00-imut."

4. § 26,imm. 1-imi nr. 3-p kingorna nutaatut ilanngunneqassaaq nr. 4:

"4) Unnuakkut ullut freerfiusussat nallilerneranni nal. 12.00-imut 04.00-imut. Freerfiusussat ima paasineqassapput ullut nalliuttut, tak. § 2, imm. 7."

5. § 26-ip kingornatigut immikkoortumut qulequataq imatut oqaasertalerneqassaaq:

"Imigassanik aalakoornartortalinnik akeqanngitsumik agguaneq"

6. § 27-imi, imm. 1 – 2 aamma imm. 4 – 5, atorunnaarsinneqarput.

Imm. 3 tamatuma kingornatigut tassaalerpoq imm. 1.

7. § 27-p kingornaniittooq immikkoortup qulequataa peerpoq.

8. § 28 atorunnaarsinneqarpoq.

9. § 32-mi imm. 1-ip kingornatigut imm. 2 nutaaq ilanngunneqassaaq:

"*Imm. 2. Politiit piginnittunut aamma aqutsisunut paasissutissat ingerlateqqissinnaavaat inunnut imm. 1 naapertorlugu sassaalliateqarfimmi pineqartumi isersimanissamut inerteqquqteqarfingeqartunut tunngasut.*"

Imm. 2 taamaalluni tassaalerpoq imm. 6.

10. § 32-imi imm. 2-p kingornatigut imm 3-5-itut ilanngunneqassapput:

"*Imm. 3. Paasissutissat politiinit imm. 2 tunngavigalugu ingerlateqqinnejartut taamaallaat piginnittunit, aqutsisunit aamma matulerisunit suliarineqarsinnaapput, taamaattorli tak. imm. 4, suliarinninnerlu taamaallaat pisinnaavoq imm. 1 naapertorlugu inerteqquqtingeqartup atuutsinneqarnissaata pisariaqarnera tunngavigalugu.*

Imm. 4. Piginnittut, aqutsisut aamma matulerisut nipangiussisussaatitaapput paasissutissanut imm. 2-mi taaneqartunut tunngatillugu. Tamanna taamatuttaaq atuuppoq inunnut imm. 5 naapertorlugu aalajangersakkat aalajangersarneqarsimasut kingunerisaannik paasissutissanik pineqartunik suliarinnittussanngortitaasut. Pinerluttulerinerimi inatsit §§ 50 – 54.

Imm. 5. Taamatuttaaq Naalakkersuisut maleruaqqusanik aalajangersaasinnaapput paasissutissat imm. 3-mi taaneqartut suliarineqarnissaannut tunngatillugu, tamatumunnga ilanggullugit paasissutissat pineqartut inunnit allanit, imm. 3-mi taaneqartut saniatigut, suliarineqarsinnaanerannut tunngatillugu."

11. § 43-mi, imm. 1, peerneqarpoq "§ 27, imm. 1 aamma 3, § 28, imm. 1,".

§ 2

Inatsisartut inatsisaat ullup saqqummiunneqarfimmi aqaguani atortuulissaq.

Namminersorlutik Oqartussat, ulloq 12. juni 2019

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut